

Weka Hatia Yako Chini ya Msalaba

Huku mkimtwika yeye fadhaa zenu zote, kwa maana yeye hujishughulisha sana kwa mambo yenu—1 Petro 5:7.

Huzuni, wasiwasi, kutoridhika, majuto, hatia na mashaka, vyote hivi vina mwelekeo wa kuvunja nguvu za uzima na kukaribisha hali ya kudhoofu na mauti (*The Ministry of Healing*, 241).

Hisia ya hatia sharti isalimishwe chini ya msalaba wa Yesu pale Kalvari. Hisia za dhambi zimetia sumu chemchemi za uzima na furaha ya kweli. Sasa Yesu anasema, nitwike Mimi zote, nitabeba dhambi yako. Nitakupatia Amani. Usiendeleo kuharibu heshima yako, kwa kuwa nimekununua kwa gharama ya damu Yangu mwenyewe. Wewe u Wangu, Nitaiimarisha nia yako iliyodhoofishwa; Nitayaondoa majuto uliyo nayo kwa sababu ya dhambi.

Basi geuza moyo wako wa shukrani, uliojawa na hofu kutokana na mashaka na ulishikilie tumaini lililowekwa mbele yako. Mungu anaukubali moyo uliovunjika na kupondeka. Anakupatia msamaha bure. Anajitolea kukuasili katika familia Yake, kwa neema Yake akusaidie udhaifu wako na Yesu mpendwa atakuongoza hatua kwa hatua ikiwa tu utaushikilia mkono Wake na kumruhusu Yeye akuongoze.

Shetani anatafuta kuhamisha akili zetu mbali zaidi na Msaidizi mkuu, ili kutuongoza kufikiria juu ya uharibifu wa roho. Lakini ijapokuwa Yesu anaona hatia za wakati uliopita, anaongelea msamaha; na tusimvunjie heshima kwa kutilia shaka upendo Wake....

Ikiwa unajihisi mwenyewe kuwa mwenye dhambi mkuu, Yesu ndiye hitaji lako, Mwokozi mkuu kabisa. Inua kichwa chako juu na utazame mbali, mbali na dhambi yako, kwa Mwokozi aliyeinuliwa; mbali na mng'ato wa joka katili mwenye sumu kali hadi kwa MwanaKondoo wa Mungu aichukuaye dhambi ya ulimwengu.

Amechukua mzigo wa hatia yetu. Atauchukua mzigo kutoka kwenye mabega yetu yaliyochoka. Atatupatia pumziko. Atauchukua pia mzigo wa masumbuko na wa huzuni zetu. Anatualika tumtwike masumbuko yetu juu Yake, kwa maana anatubeba juu ya moyo Wake (*Mind, Character, and Personality* 2:451, 452).

Injili inapokelewa katika usafi na uwezo wake, ni tiba kwa magonjwa ambayo chanzo chake ni dhambi. Jua la Haki litawazukia, “lenye kuponya katika mbawa zake” (*Malaki* 4:2)....

Upendo ambao Yesu anaueneza katika kiumbe kizima ni nguvu iletayo uzima. Kila sehemu muhimu ya ubongo, moyo na neva huvigusa kwa uponyaji. Kwa hiyo nguvu za juu zaidi za kiumbe zinaamshwa ili kufanya kazi. Unaiweka nafsi huru dhidi ya hatia na huzuni, wasiwasi na masumbuko, ambayo huangamiza nguvu za uzima. Inatuletea hali ya kuwa shwari na utulivu. Inaotesha furaha moyoni ambayo hakuna kitu cha kidunia kinachoweza kuiharibu—furaha katika Roho Mtakatifu—aletaye afya na furaha itiyayo uzima (*The Ministry of Healing*, 115).